

## Su Grupu Folk Terranoesu e sas traditziones suas.

Una traditzione longa prus de baranta annos, in su sinnu de unu folklore chi at raighinas antigas: custa est s'istòria de su Grupu Folk Terranoesu, chi cun sos costùmenes colorados e cun sos ballos suos, giughet a dae in antis, unu tretu importante de s'identidade culturale gadduresa.

Su grupu naschet in su 1978, cun s'intentu de nde torrare a pizu sos costùmenes e sas traditziones de sa tzitade, pro fàghere a manera chi no èsserent andadas pèrdidas. Sos costùmenes sunt istados torrados a fàghere in manera fidele; sos de sas fèminas sunt tres, su costùmene de isposa, cussu de bajana e cussu de cojuada. Sos costùmenes de òmine sunt duos: cussu de sos possidentes prus ricos e cussu prus sèmplitze de sos prus pòberos.

Custu assòtziu est ligadu meda cun su Santu Patronu de Terranoa, difatis naschet pròpiu in onore de Santu Simplitziu, inaugurende una traditzione chi dae tando non s'est mai firmada: "sos òmines s'òcupant de giùghere a coddu s'istàtua de su santu, imbetzes sas fèminas, in antis de cumintzare sa protzessione, giughent una



canistedda de rosas a creja, chi benint beneitas e a pustis dadas a sa zente. Sa cultura tradizionale, torrada in vida gràtzias a su grupu, partit dae sos costùmenes e arribbat a sa dantza, cun "Su Scottis", cramadu su ballu de sos istatzos. Est unu ballu chi acudit dae s'Iscòtzia e chi s'est ispartu solu in sas costas gadduresas. Su primu a lu giùghere in sos palcos e in sas pratzas, est istadu su grupu folk terranoesu (binchende finas unu tìtulu mundiale), ma custu fiat presente dae prus de unu sèculu. Subra a custu ballu b'at diversos contos istòricos, unu de sos prus particulares narat chi su ballu fiat insinzadu in sos istatzos e chi cando intra a custos beniant fatos sos pamentos, beniant cramadas sas còpias de sas domos a curtzu pro andare a ballare su scottis, a manera de pòdere aparinare su pamentu.

De contos subra custu ballu bi nd'at meda, còsa tzerta est chi benit tramandadu dae mastru in mastru.